

**Uunga siunnersuut: Aatsitassat pillugit ingerlatallu tamatumunnga pingaarutillit pillugit Inatsisartut inatsisaata allannguuteqartinneqarnissaa pillugu Inatsisartut inatsisaat nr. 7, 7. december 2009-imeersoq** (aatsitassanut ikummatissanullu inatsit)  
(Aatsitassanut oqartussaasoq, annikitsumik aatsitassarsiorluni misissuineq paaanerlu, akuersissummik peqarani aatsitassanik katersisarneq paaasernerlu aammalu inuiaqatigiinni piujuartussamik iluaqutaasumik sunniuteqartitsisarneq pillugit il.il. maleruagassani allannguuteqartitsineq)  
*(Inuussutissarsiornermut Aatsitassarsiornermullu Naalakkersuisoq)*

**pillugu**

**Inuussutissarsiornermut Ataatsimiititaliap**

**ISUMALUTISSIISSUTAA**

**Siunnersuutip aappassaaneerreqarneranut saqqummiunneqartoq**

Inuussutissarsiornermut Ataatsimiititaliap siunnersuummik suliarinninnermini ukuninnga inuttaqarpoq:

Inatsisartunut ilaasortaq Naaja Nathanielsen, Inuit Ataqatigiit, siulittaasoq  
Inatsisartunut ilaasortaq Andreas Uldum, Demokraatit, siulittaasup tullia  
Inatsisartunut ilaasortaq Kim Kielsen, Siumut  
Inatsisartunut ilaasortaq Akitsinnguaq Olsen, Siumut  
Inatsisartunut ilaasortaq Knud Fleischer, Kattusseqatigiit Partiiat  
Inatsisartunut ilaasortaq Aqqaluaq B. Egede, Inuit Ataqatigiit  
Inatsisartunut ilaasortaq Karl Lyberth, Siumut

Inatsisartut 2012-imi ukiakkut oktoberip 22-ani ataatsimiinneranni siullermeerinninnerup kingorna siunnersuut Inatsisartunit innersuunneqartoq ataatsimiititaliap misissorpaa matumuunalu isumaliutersuutini naliliininilu Inatsisartut suliarinninnissaannut saqqummiullugit.

**1. Siunnersuutip imarisaa siunertaalu.**

Aatsitassat pillugit ingerlatallu tamatumunnga pingaarutillit pillugit Inatsisartut inatsisaat nr. 7, 7. decemberimeersoq (aatsitassanut ikummatissanullu inatsit) 1. januar 2010-mi atuutilerpoq.

Misilittakkat ilisimasallu aatsitassat pillugit inatsit atuuttoq tunngavigalugu katersorneqarsimasut inatsisartut inatsisissaata suliarineqarnerani annertuumik tunngaviupput, tassuuna Naalakkersuisut siulittaasuata danskillu nukissiuutinut ministeriata isumaqatigiissuteqarnerisigut suleqatigiissitap 1990-imi pilersinneqartup kaammattuutai atuutilersinneqarput.

Aatsitassanut inatsisip atuutilersinneqarnerata kingorna Naalakkersuisut aatsitassarsiorlunin samut akuersissutinik amerlanerujussuarnik tunniussaqqarput, aammalu aatsitassarsiorluni ingerlatat amerlanerujussuit pisariunerujussuillu suliarineqarsimallutik. Ingerlatat Namminer-sorlutik Oqartussanut, suliffeqqarfinnut kalaallinit pigineqartunut aamma sulisunut nunaqavis-sunut annertuumik suliffissaqartitsisimapput, qaffasinnerusumillu isertitaqqarfiullutik.

Aatsitassanut inatsit aammattaaq, aatsitassanik piiannerup naleqquttumik ingerlanneqarnis-saanut, aatsitassarsiorluni ingerlatat isumannaallisaanikkut, peqqissutsimut, avatangiisinut aamma inuiaqatigiinni piujuartitsinissamik tunngaveqarnerup aalajangiusimaannarneqarnis-saannut ineriartortinnissaannullu iluaqutaavoq, aamma aatsitassarsiorluni ingerlatat naleq-quttumik aammalu pissutsini assingusuni nunani tamalaani suleriaatsinut pitsaanerpaanut naapertuuttumik ingerlanneqarnissaannut.

Avatangiisinut tunngassutillit pillugit ulluinnarni oqartussaasunit suliarinnittarnerup aatsi-tassanut tunngassutilinnik (pisuussutinut tunngassutillit) ulluinnarni suliarinnittarnermit im-mikkoortinneqarnissaat Naalakkersuisut inatsisissatut siunnersuut aqputigalugu kissatigaat. Immikkoortitsinissaq taanna siunnersuummi ingerlanneqassaaq. Peqatigisaanik maannakkut suleriaasiusup attatiinnarneqarnissaa inatsisitigullu aalajangersagaanissaa Naalakkersuisut kissaatigaat, taanna malillugu aatsitassarsiornermik suliaqartut allallu aatsitassanut su-liassaqqarfimmi oqartussaasut suliarinnittarnerannut taamaallaat ataasiinnarmik saaffissaqas-sallutik (one door). Uuliasiorfiutileqatigiiffiit aamma aatsitassarsiorfiutileqatigiiffiit maan-nakkut suleriaasiusoq nalinginnaasumik naammagisimaartorujussuuaat. Siunnersuummi aqqissuussinermi nutaami taamaalilluni matup ataasiinnaanissaanik tunngaveqarneq attati-innarneqarpoq, kisiannili avatangiisinut tunngassutillit pillugit ulluinnarni oqartussaasunit sullinneqartarneq aatsitassanut tunngassutilinnik (pisuussutinut tunngassutillit) suliarin-nittarnermit immikkoortinneqarluni.

Aatsitassarsiornerup iluani oqartussaasut sullissisarnerisa ataatsimoortinneqarnissaannik siun-nersuummi tunngavilersuutigineqartoq nangingneqarpoq, pingaartumik avatangiisinut tunnga-sut, teknikkimut, sillimaniarnermut tunngasut pisuussutinullu tunngasut aatsitassarsiornermik ingerlatap nalilersorneqarnerani tunngaviusut. Taamaalilluni pissutsinut ingerlatanut pingaa-ruteqartunut inatsimmut ilaasunut akuersissummik taamaallaat tunniussisoqartarpoq.

Siunnersuummi, aatsitassanut suliaassaqqarfimmut tunngatillugu avatangiisinut pissutsinik oqartussaasut suliarinnittarnerannut tunngatillugu, aatsitassanut oqartussaasup aqqissuus-saanera atuuffiilu pillugit aatsitassanut inatsimmi maleruagassanik nutaanik aalajangersaa-soqarpoq. Siunnersuut malillugu aatsitassanut oqartussaaffik Naalakkersuisut ataanittoq mar-

lunnik oqartussaasoqassaaq. Aappa tassaalluni Aatsitassanut Aqutsisoqarfik, tassaasoq aatsitassanut suliassaqarfimmi pissutsinut tamaginnut, avatangiisinut pissutsit ilaatinnagit, oqartussaasoq. Aappaa tassaassaaq Aatsitassanut suliassaqarfimmi Avatangiisinut Aqutsisoqarfik, aatsitassanut suliassaqarfimmi avatangiisinut pissutsinut oqartussaasuusoq.

Siunnersuummi Aatsitassanut Aqutsisoqarfimmit imaluunniit Avatangiisinut Aqutsisoqarfimmit suliaq aalajangiivigineqartoq pillugu Naalackersuisunut naammagittaalliutigineqarsinnaaneri maleruagassatigut nutaatigut aalajangersarneqarput.

Ulloq 1. januar 2010 aatsitassanut inatsisip atuutilerneraniilli, akuersisummik peqarani annikitsumik aatsitassarsiorluni ingerlataqarsinnaanermut aamma aatsitassanik katersisinnaanermut paaasinnaanermullu periarfissaqarnissaq qulakkeerneqassasoq Kalaallit Nunaanni innuttaasunit kissaatigineqaraluttuinnartoq Naalackersuisut malugisimavaat. Aamma annikitsumik aatsitassarsiornissamut kisermaassisussaatitaanani akuersisutini annikitsumik qaartiterinermik atuinissamik periarfissaqarnissaq kissaatigineqartoq saqqummiunneqarpoq.

Tamanna tunngavigalugu, aatsitassanut inatsimmi kapitali 8-imi annikitsumik aatsitassarsiorluni ingerlataqartarneq pillugu aamma kapitali 11-imi akuersisummik peqarani aatsitassanik katersisarneq paaasarnerlu pillugit maleruagassani allannguutit aalajangersimasut piviusunngortinneqassasut siunnersuutigineqarpoq.

Siunnersuut malillugu annikitsumik aatsitassarsiornermut suliassaqarfimmi aamma akuersisummik peqarani katersisarnermut suliassaqarfimmi maleruagassanut atuuttunut tunngatillugu maleruagassanik pisariillisaasoqarpoq. Maleruagassanik pisariillisaanissaq kissaatigineqartoq taanna pilersissinnaajumallugu, maleruagassani atuuttuni ataasiakkaani erseqqissaanissaq aammalu annikinnerusumik ersarissaanissaq pisariaqarsimavoq.

Siunissami ungasinnerusumi anguniagaavoq, annikitsumik aatsitassarsiorluni ingerlatanik annertunerusumik ingerlatsisoqartalernissaa, aammalu taamaaqataanik akuersisummik peqarani aatsitassanik katersisarnermut paaasarnermullu tunngatillugu ineriartortitsisoqassasoq.

Siunnersuummi pingaartumik nunaqavissut aatsitassarsiorluni ingerlataqarsinnaalernissaat siuarsarneqassaaq.

Taamaalilluni inuiaqatigiinni piujuartitsinissap atitunerusumik tapersersorneqarnissaa pingaartumik tassani pineqarpoq.

Tamatuma saniatigut siunnersuummi annikitsumik aatsitassarsiorluni ingerlatanut tunngatillugu pitsanngorsaanerit, aatsitassanik pitsaanerusumik atorluaasinnaanissamut annikitsumik aatsitassarsiorluni ingerlatani taamaallaat niuerutigalugu atorluarneqarsinnaasunut iluaqutaasapput.

Aatsitassarsiorluni ingerlatat isumannaallisaanermut, avatangiisinut, pisuussutinik atorlu-aanermut aamma inuiaqatigiinni piujuartitsinissamut tunngatillugu kiisalu pissutsini assingusuni nunani tamalaani suleriaatsinut pitsaasunut akuerisaasunut naapertuuttumik isumannaatumik ingerlanneqartarnissaannik Naalakkersuisut politikkiannut siunnersuut naapertuuppoq. Aatsitassanut inatsimmi §§ 1 aamma 83 tamanna pillugu piumasaqaatinik assingusunik taakku imaqarput.

Aammattaaq siunnersuut Naalakkersuisut politikkiannut, tassalu aatsitassarsiornermik suliasaqarfik ineriartortitsiviullunilu siuariartortitsiviunissaanut naapertuuppoq, Kalaallit Nunaanni ataatsimut aningaasaqarneranut inuussutissarsiornikkullu ineriartortitsinermut siuariartuutaassamik.

## **2. Siunnersuutip Inatsisartuni suliarineqarnera.**

Nunatsinni pinngortitap pisuussutaanik atorluanaanermi pitsaanerpaamik atugassaqaartitsinissaq annertunerpaamillu pissarsinissaq siunertaralugit inatsisit ingerlaavartumik naleqqussarniarneqarnerat inatsisissatut siunnersuutip siullermeerneqarnerani partiinit nalinginnaasumik iluarisimaarneqarpoq.

Taamatullu naammagittaaliuuteqarsinnaanerup erseqqissaatigineqarnera kiisalu oqartussaasut ulluinnarni suliarinninnerit avissaartinneqarnerat, tamaalillunilu aatsitassarsiornermi avatangiisinut tunngasut Avatangiisinut Aqutsisoqarfimmut aqutsinermut oqartussaasussamut inissinneqarnerat iluarisimaarneqarpoq.

## **3. Tusarniaanermut akissutigineqartut.**

Tusarniaanermut akissutigineqartut inatsisissatut siunnersuummut ilanngunneqarput.

Siunnersuut piffissami 2012-imi julip 30-aniit septemberip 9-ta tungaanut nittartakkakkut tusarniaavimmi saqqumitinneqarpoq aammalu oqartussaasunut, kattuffinnut suliffeqarfinnullu susassaqaartunut tusarniaassutigineqarluni. Inatsisissatut siunnersuutit annertuut pineqartillugit, taakkuninnga tusarniaaneq sulinngiffeqarnerup nalaani pitillugu, piffissap tusarniaaffiusup siunissami sivitsorneqartarnissaannik Naalakkersuisut ataatsimiititaliamit kaammattorneqarput. Tusarniaanermut akissutit pingaernerit taakkunungalu Naalakkersuisut oqaaseqaataat inatsisissatut siunnersuummut nalinginnaasumik nassuiaatini eqqartorneqartut ataatsimiititaliamit oqaatigineqassaaq. Naalakkersuisulli tapiliussamik tusarniaanermut allakkialiorsimapput, tassani Transparency Greenlandimit aamma ICC-mit akissutisarineqartut oqaaseqarfineqarput.

## **4. Apeqqutit.**

Siunnersuummik suliarinninnerminut atugassatut apeqqutit arlallit akissuteqarfigeqqullugit ataatsimiititaliap Naalakkersuisut qinnuigisimavai. Ataatsimiititaliap apeqqutaasa aammalu Naalakkersuisut akissutaasa assilineri isumaliutissiissummut matumunnga **ilangussatut** ilaatinneqarput.

**5. Ilisimatitsiffiusumik ataatsimiinnerit.**

Siunnersuummik suliarinninnerminut atatillugu ataatsimiititaliap GA., SIK., ICC aamma Transparency Greenland ataatsimeeqatigai. Aammattaaq tamatuma saniatigut Naalakkersuisut Siulittaasuat kiisalu Inuussutissarsiornermut Aatsitassanullu Naalakkersuisoq apersorneqarput.

**6. Ataatsimiititaliap siunnersuummik suliarinninnera.**

Ataatsimiititaliap isumaqarpoq, inatsisissatut siunnersuummik taakkunungalu nassuiaatinik suliarinninnermut atatillugu piareersaataasumik suliaqarneq sukumiisumik ingerlanneqarsimasoq, taakku inatsisissatut siunnersuummi aalajangersakkat qanoq paasineqarnissaannut tapertassatut ataatsimiititaliamit nalinginnaasumik innersuussutigineqarput.

Inatsisissatut siunnersuummi immikkoortunut ataasiakkaanut ataatsimiititaliap ima oqaaseqaateqarumavoq:

**6.1. Aatsitassanut oqartussaaffiup avinneqarnera**

Ataasiinnarmik saaffissaqarnissap (one door) attatiinnarneqarnera ilutigitillugu oqartussaaneqarup Aatsitassarsiornermut Aqutsisoqarfimmut aammalu Avatangiisinut Aqutsisoqarfimmut aatsitassarsiornermut tunngasuni avatangiisinut aqutsisussamut avinneqarneri ataatsimiititaliamit pitsaasutut isigineqarpoq. Tassunga atatillugu Avatangiisinut Aqutsisoqarfiup aatsitassarsiornermi pissutsinut avatangiisinut tunngasunut nammineq aalajangiinnaasuseqarluni immikkoortutut nammineertutut inissisimanagera, taamaalillunilu Aatsitassarsiornermut Aqutsisoqarfiup ataaniinginnera, ataatsimiititaliamit pingaaruteqartutut isigineqarpoq. Avatangiisinut Aqutsisoqarfiup aallaqaammut ilaatigut Nationalt Center for Miljø- og Energimik (DCE) suleqateqarluni suliaqarfik pillugu immikkut ilisimasamik piginnaasannillu ineriartortitsinissaa ataatsimiititaliamit pingaartutut isigineqarpoq, isumaqarlunili ungasinnerusoq eqqarsaatigalugu aqutsisoqarfiup avatangiisinullu nalinginnaasumik oqartussaasut akornanni suleqatigiinnermik pilersitsisoqassasoq, isumaqarlunili aqutsisoqarfiup kiisalu Kalaallit Nunaanni Pinngortitaleriffiup akornanni suleqatigiittoqalissasoq, taamaalilluni ilisimasat piginnaasallu ingerlateqqinneqarniassammata Pinngortitaleriffiup siunissami tamakkiisumik ilaannakortumilluunniit Nationalt Center for Miljø- og Energimit suliasamik tigusinnaanissaa siunertaralugu.

**6.2. Ingerlatat inuiaqatigiinnut imaluunniit avatangiisinut annertuumik pingaaruteqalersinnaasut.**

Ingerlatat inuiaqatigiinnut imaluunniit avatangiisinut annertuumik pingaaruteqalersinnaasut Naalakkersuisunit akuerineqartarnissaannik Naalakkersuisut oqarnerat ataatsimiititaliamit taperserineqarpoq. Tassunga atatillugu apeqquteqaat aallaavigalugu oqallisissiamut UKA 2011/50-imut akissut ataatsimiititaliap Naalakkersuisunut eqqumaffigeqqusimavaa, tassani siunnersuutigineqarluni siunissami aatsitassarsiornermik suliniutinut annertuunut akuersisutit, sulianut taakkununga tunngatillugu Naalakkersuisut aalajangiinginnerini, Inuussutis-

sarsiornermut Ataatsimiititaliamut oqaaseqarfigisassanngorlugit saqqummiunneqartassasut. Naalakkersuisut tassunga akissutaat ataatsimiititaliamit maluginiarneqarpoq. Suliassat inatsisiliortutut atuutsitsisussatullu oqartussaasunut agguataarneqarneri eqqarsaatigalugit aammalu Inatsisartut Ombudsmandiata suliassamik ingerlatsisinnaanera pinngitsoortikkumanaagu, suliat inuiaqatigiinnut avatangiisinulluunniit malunnaatilimmik sunniuteqarsinnaasut pillugit Inatsisartut ataatsimiititaliaanut susasaqartumut Naalakkersuisut suliani aalajangiitinnagit ilisimatitsissutitut ingerlatinneqartarnissaat taamaallaat ataatsimiititaliap kissaatigaa.

**Naalakkersuisut tamanna pillugu allannguutissatut siunnersuutissaat Inuussutissarsiornermut Ataatsimiititaliap qilanaaraa.**

**6.3. Naammagittaalliornissamut periarfissat.**

Naalakkersuisunut naammagittaalliorsinnaaneq pillugu maleruagassat ataatsimiititaliamit ilassilluarneqarput. Naammagittaallioortarfimmik arlaannaannulluunniit attuumassuteqanngitsumik pilersitsisoqannginnissaa pillugu Naalakkersuisut ataatsimiititaliamit isumaqatigineqarput, aamma suliat Naalakkersuisunit taamaallaat aalajangiiffigineqartut pillugit.

Immikkoortup tamatuma suliarineranut atatillugu inatsisissatut siunnersuutip aalajangersagartaani Naalakkersuisunut naammagittaalliorsinnaanermut tunngasup isornartorsiorneqarnera ataatsimiititaliap maluginiarpaa. Naammagittaalliuutinut taakkununga tunngatillugu ataatsimiititaliap isummerniarnermini inatsisissatut siunnersuutip oqaaseqaatitai aammalu tusarniaatitsinermi tapiliussatut allakkiamut oqaaserineqartut maluginiarsimavai. Tamanna tunngavigalugu ataatsimiititaliaq isumaqarpoq tamanna naammattumik qulaajaavigineqartoq. Ataatsimiititaliaq isumaqarmat, aalajangersakkap oqaasertaliornera malillugu sumut atatillugu Naalakkersuisut "Namminersorlutik Oqartussanut tunngasuni naalakkersuinikkut aqutsinermi oqartussaasutut Inatsisartunit saaffissatut toqqarneqartut" takuneqarsinnaammat.

Akerlianilli aalajangiineq pillugu kikkut naammagittaalliorsinnaanerat inatsisissatut siunnersuummi isummerfigineqannginnera pitsaanngitsutut ataatsimiititaliamit isigineqarpoq. Avatangiisinut inatsimmi § 60-imi (Inatsisartut inatsisaat nr. 9, 22/11 2011-meersumi) uku naammagittaalliorsinnaasutut allassimapput:

1. *"Aalajangiiffigineqartut."*
2. *"Nunatsinni Nakorsaaneqarfik."*
3. *"Kinaluunniit suliap qanoq naammassineqarnissaanut nammineq immikkut annertuumillu soqutigisaqartoq."*
4. *"Pegatigiiffiit suleqatigiiffillu, malittarisassatik naapertorlugit nunanik peqqissarfiullutik qasuersaarfiusartunik, avatangiisinik pinngortitamillu annertuumik soqutigisanik isumagisaqarnissamik siunertaqartut."*

Aalajangiineq pillugu innuttaasut naammagittaalliorsinnaanermut periarfissaqarnissaat eqqarsaatigalugu aammalu kikkut naammagittaalliorsinnaatitaanersut pillugu oqallinnissaq pinngit-

soorniarlugu aatsitassat pillugit inatsimmi maleruagassanik taamaattunik ilanngussinissaq pisariaqartoq ataatsimiititaliaq isumaqarpoq.

**Naalakkersuisut tamanna pillugu allannguutissatut siunnersuutissaat Ataatsimiititaliap qilanaaraa.**

Kiisalu assersuutigalugu naammagittaalliummik suliarinninneq immikkut ilisimasalimmik pisariaqartitsiviusoq paasinarsissappat, naammagittaalliorsinnaaneq mattunneqassasoq Naalakkersuisut (tak. § 3 c) aalajangiisinnaammata ataatsimiititaliamit eqqarsarnartoqartinneqarpoq. Taamatut piginnaatitsissuteqarnikkut naammagittaalliorsinnaanermut annertuumik mattussisinnaaneq ammaanekarpoq. Aalajangersakkamut siunertaq ataatsimiititaliamit maluginiarneqarpoq, taannalu naammagittaalliornissamut nalinginnaasumik mattussinermut aalajangersagaq atorneqanngippat akuersaarneqarpoq.

Ataatsimiititaliap pingaaruteqavissortutut isigaa, Aatsitassarsiornermut inatsit naapertorlugu akuersissummik tunniussisoqarneranut atatillugu pingaartumik pisuni, tusarniaasoqassatillugu suliamik suliarinninnissamut piffissaliilluartoqartassasoq, taamaalilluni tusarniaatitsinermut attuumassuteqartut tamarnik akissuteqarnissaminut naammattumik piffissaqartinneqartassammata.

Aammattaaq ataatsimiititaliaq isumaqarpoq naammagittaalliornissamut piffissarititaasoq sivi-kippallaartoq, pingaartumik suliniutit annertunerusut pineqartillugit, isumaqarlunilu **naammagittaalliornissamut piffissaliunneqartoq sapaatit akunnerinut arfinilinnut sivit-sorneqarsinnaasoq**, taamaaliornikkut avatangiisinut inatsimmi naammagittaalliornissamut piffissaritinneqartumut naapertuunnerulissammat.

**Naalakkersuisut tamanna pillugu allannguutissatut siunnersuutissaat Ataatsimiititaliap qilanaaraa.**

**6.4. Nunaqavissunik sulisoqarnissaq suliffeqarfiillu nunatsinneersut sulisorineqarnissaat (§ 18).**

Aatsitassarsiornermut atatillugu sulisut suliffeqarfiillu nunatsinneersut sapinngisamik annertunerpaamik atorneqarnissaat ataatsimiititaliamit aammalu partiinit ataasiakkaanit assut pingaartinneqarpoq. Tamanna tunngavigalugu ataatsimiititaliaq isumaqarpoq § 18, imm. 1-imi aamma 2-mi "*aalajangerneqarsinnaavoq*" ima allanngortinneqassasoq "*aalajangerneqassaaq*". Taamatut allannguinerup kingunerissavaa § 16 naapertorlugu akuersissuteqarnernut atatillugu pinerit tamaasa apeqqut isummerfigineqartassasoq aammalu piginnaatitsissummik pigisaqartup ilisimassavaa tamanna akuersissummi pinngitsoorani ilaatinneqassasoq, taamaalillunilu qanoq annertutiginnissaa kisimi isumaqatigiinniutigineqassalluni.

**Naalakkersuisut tamanna pillugu allannguutissatut siunnersuutissaat Ataatsimiititaliap qilanaaraa.**

**6.5. Aatsitassarsiornerit annikitsut.**

Inatsisissatut siunnersuut naapertorlugu inuussutissarsiutigiginagu katersineq (§ 45) aamma inuussutissarsiutigalugu katersineq (§ 45 a) maanna immikkoortinneqarput. Inuussutissarsiutigiginagu katersinermi aatsitassat nunap qaaniittut nalituujunngitsut kisimik katersorneqarsinnaapput. Inuussutissarsiutigalugu katersinermi sakkut assaannarmik tigummiartakkat atorlugit aatsitassanik aamma paaasoqarsinnaavoq. Ujaqqanik katersisartut kissaateqarnerat malillugu aalajangersagaq inatsisissatut siunnersuummut ilanngunneqarpoq, aammalu annikitsumik aatsitassarsiornissamik qinnuteqanngikkaluarluni nunaqavissup katersarisinnaasai 100.000 kr.-inut killilerneqarlutik.

Ataatsimiititaliaq oqalliseqateqartarnini tunngavigalugit isumaqarpoq, aningaasat kr. 100.000-nut tagginneqarsimanerat naleqquttusoq, taamaattorli ataatsimiititaliaq isumaqarluni, aningaasanut killiliussap taassuma iluani aamma inuussutissarsiornermi atugassatut ujaqqanik nalikinnerusunik soorlu Tugtupit, Topas aamma Grønlandit (ujaqqat siornatigut ujaqqatut nalituutungajaq oqaatigineqartartut) katersisoqarsinnaasariaqartoq. Ujaqqanik erlinnartunik soorlu aligoqqiiniq, Brillantinik, Rubinik, Safirinik Smagradinillu kiisalu radioaktivinik akulinnik katersisoqaaqusaanngilaq. Tamatumunnga atatillugu ataatsimiititaliap qilanaaraa Naalakkersuisut annikitsumik aatsitassarsiorniarluni akuersissuteqartarnermik pisariillisaanisaat, taamaalilluni anguneqarsinnaaqqullugu tamatuma assersuutigalugu piniarsinnaanermut allagartartaarniarnertu ajornanngitsigilernissaa.

Ataatsimiititaliaq aammattaaq isumaqarpoq, inuussutissarsiutigiginagu ujarattartartunut ujaqqanik assingusunik nunap qaaniittunik katersisinnaanissaq aamma akuerisaasariaqartoq.

**Naalakkersuisut tamanna pillugu allannguutissatut siunnersuutissaat Ataatsimiititaliap qilanaaraa.**

Annikitsumik qaartiterinissamik akuersissutitaqartumik annikitsumik aatsitassarsiornissamik akuersissummik tunniussisarnissamut ataatsimiititaliaq paasinnippoq, piginnaatitsissummik pigisaqartoq qaartiterutit pillugit pisariaqartumik ilisimasaqartoq ilinniarsimasorlu Naalakkersuisunit qulakkeerneqarsinnaappat, taamaaliornikkut qaartoornikkut ajutoornerit pinngitsoortinneqarsinnaaqqullugit. Annikitsumik qaartiterinissamik akuersissutitaqartumik annikitsumik aatsitassarsiornissamut akuersissummik tunniussinermut atatillugu taamatut akuersissummik tunniussinermut avatangiisinut pinngortitamullu sunniutigisinnaasai isumaliutigineqartariaqartut aammalu saliinissamut imaluunniit avatangiisinik mingutsitsinissamut qularnaveeqqusiinermik aningaaseriviulluunniit qularnaveeqqusiinernik piimasaqateqartoqarsinnaasoq ataatsimiititaliaq isumaqarpoq.

**6.6. Takornariat ujaqqanik katersisinnaanerat.**

Aatsitassanik nunap qaaniittunik takornariat ukiumut 5 kg. tikillugu katersisinnaanissaat inatsisissatut siunnersuummi siunniunneqarpoq. Takornariat ujaqqamik ataatsimik arlalinnil-



luunniit tammajuitsussaminnik assut katerserusuttarnerat suliame ajornartorsiutaasup maleru-agassatigut aaqqivigineqarnera tunngavilersuutitut Naalakkersuisut oqaatigaat.

Ataatsimiititaliaq isumaqarpoq, nunaqavissuunngitsut (takornariat) ujaqqanik katerseqqusaas-sanngitsut, ataatsimiititaliaq isumaqarmat, takornariat tunngaviatigut takornariartitsiviit tam-majuitsuarniarfiini ujaqqanik tammajuitsussaminnik pisisariaqaraluartut.

**Naalakkersuisut tamanna pillugu allannguutissatut siunnersuutissaat Ataatsimiititaliap qilanaaraa.**

**6.7. Inuiaqatigiinni piujuartitsinissamik nalilersuineq (VSB).**

Inatsissatut siunnersuummi § 78a-mut tunngatillugu ataatsimiititaliaq aamma isumaqarpoq "...sinnaapput" "...ssaaq"-mik taarserneqassasoq, taamaaliornikkut § 16 malillugu akuersis-summi Naalakkersuisut piumasaqaatinik aalajangersaassapput, piginnaatitsissummik pigisa-qartoq inuiaqatigiinni piujuartitsinissamik aammalu pissutsit inuiaqatigiit aningaasaqarneran-nut tunngasut allat pillugit qanoq annertutigisumik isumaqatigiissuteqartoqassanersoq. Tamanna § 18-imut ataatsimiititaliap oqaaseqaatai naapertorlugit.

**Naalakkersuisut tamanna pillugu allannguutissatut siunnersuutissaat Ataatsimiititaliap qilanaaraa.**

**7. Siunnersuutip aningaasatigut kingunerisassai.**

Siunnersuutip piviusunngortinneqarnerani aningaasatigut kingunerisassat siunnersuummut nalinginnaasumik nassuiaatini nassuiaatigineqarput.

Pisortanut aningaasaqarnikkut allaffissornikkullu kingunerisassat

Siunnersuutip atuutilernerani aatsitassanut suliassaqarfimmi avatangiisinut pissutsinut tunnga-tillugu oqartussaasut suliassaannik isumaginninneq, maannakkut Aatsitassanut Pisorta qarfiu-sumit oqartussaaffimmut nutaamut nuunneqassaaq, tassalu Aatsitassanut suliassaqarfimmut Avatangiisinut Aqutsisoqarfik.

Aatsitassanut suliassaqarfimmi avatangiisinut pissutsinut tunngatillugu oqartussaasut suliassaannik isumaginninnissamut aningaasanut inatsimmi ukiumoortumik aningaasaliissutit, taamatuttaaq Aatsitassanut Pisorta qarfimit Aatsitassanut suliassaqarfimmi Avatangiisinut Aqutsisoqarfimmut nuunneqassapput. Aningaasaliissutit taakkua DCE-p avatangiisinut pis-sutsinut tunngatillugu nalilersuinernik aamma aalajangiinissamut missingiutinik (inas-suteqaatit) sularinninneranut akiliutaasussanut 3 mio. koruuninik annertussuseqarput. Anin-gaasat taakkua Avatangiisinut Aqutsisoqarfimmut nutaamut nuunneqassapput.

Aatsitassanut Pisortaqarfik avatangiisinut suliassaqarfimmut tunngatillugu sulisunut allanik aningaasartuuteqartanngilaq, pissutigalugu tamanna ullumikkut DCE-mit akiliuteqarnikkut isumagineqartarmat. Aatsitassanut Pisortaqarfik inatsisiliorneq maannakkut atuuttoq malillugu aalajangiisartuuvoq nalilersuinernillu suliaqartartuulluni aammalu DCE-p nalilersuineri aamma aalajangiinissanut missingusiait tunngavigalugit Naalakkersuisunut inassuteqaateqartartuulluni. Suleqatigiinneq suleqatigiittarnerlu tamanna siunnersuut malillugu Avatangiisinut Aqutsisoqarfiup aamma DCE-p akornanni suleqatigiinnertut ingerlaannassaaq.

Siunnersuut malillugu Avatangiisinut Aqutsisoqarfik nalilersuinernik, aalajangiinernik aammalu DCE-p nalilersuineri aamma aalajangiinissamut missingusiait tunngavigalugit Naalakkersuisunut inassuteqaatinik suliaqartassaaq. Avatangiisinut Aqutsisoqarfiup suliaqarnermik taassuminnga ingerlataqarnissaa, Avatangiisinut Aqutsisoqarfimmi ingerlatsinermut nutaamik aningaasaliissuteqarnissamik pisariaqartitsinermik pilersitsisussaavoq. Siunnersuutip taakkusitaata piviusunngortinneqarnissaanut Avatangiisinut Aqutsisoqarfimmi atorfiit marluk nutaat pilersinneqartariaqartut inuttalerneqartariaqartullu nalilerneqarpoq. Tamatumunnga aningaasartuutit ukiumut 1,2 mio. koruunit missaanniissasut nalilerneqarpoq. Aningaasat taakkua maannakkut aatsitassanut suliassaqarfimmi allaffissornermut aningaasaliissutit annertususaannut naleqqiullugu aningaasartuutaanerusussaapput.

Tamatuma saniatigut siunnersuutip atuutilernerani aatsitassanut suliassaqarfimmi oqartussasut suliassaasa sinnerisa isumagineqarnerat, maannakkut Aatsitassanut Pisortaqarfiusumit oqartussaasumut nutaamut nuunneqassaaq. Aatsitassanut suliassaqarfimmi oqartussasut suliassaasa sinnerinik isumaginninnissamut aningaasanut inatsimmi ukiumoortumik aningaasaliissutaasut, taamatuttaaq Aatsitassanut Pisortaqarfimmit Aatsitassanut Aqutsisoqarfimmut nuunneqassapput.

Aammattaaq aatsitassanut suliassaqarfimmi oqartussasut aalajangiinerisa naammagittaalliutigineqarsinnaanerat siunnersuutikkut pilersinneqassaaq. Siunnersuut malillugu Aatsitassanut Aqutsisoqarfiup aamma Aatsitassanut suliassaqarfimmut Avatangiisinut Aqutsisoqarfiup aalajangiineri Naalakkersuisunut, taamaattoqarnerani suliame aalajangiisuusussanut naammagittaalliutigineqarsinnaapput.

Inuussutissarsiornermik ingerlataqartunut aningaasatigut allaffissornikkullu kingunerisassat  
Siunnersuut inuussutissarsiortunut aningaasaqarnikkut taasarialinnik sunniuteqassanngitsaq aammalu taamaallaat annikitsuinnarmik inuussutissarsiortunut allaffissornikkut sunniuteqassasooq nalilerneqarpoq.

Siunnersuut malillugu nalinginnaasumik annikitsumik aatsitassarsiorluni ingerlataqarsinnaanermut aammalu akuersisummik peqarani aatsitassanik katersisinnaanermut paaasinnaanermullu periarfissat annertusineqassapput pitsanngorsarneqarlutillu.

Avatangiisinut, pinngortitamut inuillu peqqissusannut kingunerisassat  
Siunnersuummi Kalaallit Nunaanni pinngortitamik avatangiisinillu allanngutsaaliuinerup maannamut qaffasissusaa qulakkeerneqassaaq attatiinnarneqassallunilu.

Siunnersuut avatangiisinut, pinngortitamut imaluunniit inuit peqqissusaannut tunngatillugu najoqqutassatigut maleruagassaqaanngilaq. Taamaattorli annikitsumik aatsitassarsiorluni ingerlatat pillugit siunnersuummi maleruagassat malitsigisinnaavaat pisut ilaatigut amerlanerusut ingerlataqartalernerat, taamaalillunilu aamma pinngortitamut avatangiisinullu sunniutaasut pisut ilaatigut arlaliusinnaallutik.

Innuttaasunut kingunerisassat

Siunnersuutip innuttaasunut aningaasaqarnikkut taasarialinnik sunniuteqarnissaa ilimagineqanngilaq.

### **8. Kalaallit Nunaanni Namminersorlutik Oqartussanut akuersissummik piginnittup akiliuteqartarnissaa pillugu ataatsimiititaliap oqaaseqaatai.**

Akileraarutip royaltip aatsitassarsiornermi atuutilersinneqarnissaa Siumumit kaammattuutigineqartup taperserneqarnissaa naak ataatsimiititaliami isumaqatigiinngissutaagaluartoq, taamaattoq aatsitassarsiornerup iluani akileraartarnikkut pissutsit siumut isigisumik eqqummaariffiqineqartariaqarnerisa pingaaruteqarnera, ataatsimiititaliap isumaqatigiissutigaa.

Tassunga atatillugu Kalaallit Nunaata aatsitassarsionermit ingerlatanik akileraaruseeriaasia eqqarsaatigalugu, ajornartorsiutip tamatuma nunani allani assersuunneqarsinnaasuni qanoq iliuuseqarfigineqartarneranut tunngatillugu niuernikkut pissutsit nutaamik misissuiffiqineqarnissaat ilumut pisariaqassanersoq eqqarsaasersuutigineqartariaqarpoq. Assersuutigalugu Kalaallit Nunaanni aatsitassarsiornermik ingerlatat amerlanerulerpata taamatut misissuinermik aallartitsisoqarsinnaanera eqqarsaatigineqarsinnaavoq, taamaalilluni niuernikkut pissutsinik nutaamik misissuineq aatsitassarsiornermit isertitat tigussaanagerusut misilittagarineqalersut tunngavigalugit ingerlanneqarluni. **Tamatumunnga atatillugu inatsisissatut siunnersuutip matuma aappassaaneqarnissaanut apeqqut manna Naalakkersuisut akissuteqaatiminni akissuteqarfigissagaat ataatsimiititaliap qinnuigissavai.**

*Aatsitassanut inatsimmi § 16, imm. 3 ima oqaasertaqarpoq:*

*”Imm. 1 malillugu piiaanissamut akuersissut taamaallaat aktieselskabimut tunniunneqarsinnaavoq, takuulli § 32, imm. 2. Selskabi inatsisartut inatsisaat manna malillugu akuersissummi aalajangerneqarsimasunik taamaallaat ingerlataqarsinnaavoq, selskabinillu allanik akileraaqateqaqqusaanani, pinngitsaaliisummik akileraaqateqarnissaaq eqqaassanngikkaanni. Malittarisassatut pingaarnertut selskabi Kalaallit Nunaanni nalunaarsorneqarsimasussaavoq (”angerlarsimaffeqartussaavoq”). Selskabi suliffeqarfissuarmut selskabip pigineqarfianit aningaasarlionerutinneqassanngilaq, taamaattorli selskabip allanit aningaasalersorneqarnera tamatigut nammineq aningaasaataanit uuttuut 2:1 angullugu qaangiisnaavoq. Selskabi ataatsi-*

*mut isigalugu akít "talertut takitigusut" niuertassaaq aamma piúmasaqaatit "talertut takitigusut" atortassallugit. Piginnaatitsissummik pigisaqartoq suliaqarfitsigut pisariaqartunik piginnaasaqartussaavoq kiisalu piianermi ingerlatamut pineqartumut aningaasaqarnikkut pisariaqartumik tunuliaquteqartussaalluni."*

Ataatsimiititaliap paaserusuppaa ingerlatseqatigiiffiup piaanissamut akuersissutillip nunami allani ingerlatseqatigiiffiutini aqutaq imaluunniit ingerlatseqatigiiffissuup avataanit ingerlatseqatigiiffiuk nunami allami angerlarsimaffilik ingerlatamik ingerlatsineq isumagissagaa ingerlatseqatigiiffiup toqqarsinnaanera aammalu § 17 malillugu akiliteqartitsinissap maleruarneqarnissaa eqqarsaatigalugu tamatumuuna qanoq kinguneqartitsisoqarsinnaanersoq ataatsimiititaliap paaserusuppaa. Naalakkersuisut tungaanniit siumut isigisumik suliffeqarfiit ingerlataannik aamma ingerlatsinermik isumaginnittuusut Kalaallit Nunaanni angerlarsimaffeqarnissaasa piúmasaqaataanissaa eqqarsaasersuutigineqarpa? Imaluunniit Naalakkersuisut isumaqarpat, maannakkut aatsitassanut inatsisaasumi aalajangersakkat akileraartarnerup tungaatigut avaqqussiniartoqarsinnaaneranut naammaginarumik pinngitsoortitsisinnaasut.

### **9. Ataatsimiititaliap inassuteqaatai**

Qulaani ataatsimiititaliap kaammattuutai naapertorlugit Naalakkersuisut allannguutissatut siunnersuutiniq saqqummiussereerpata, **Ataatsimiititaliap isumaqatigiittup siunnersuutip isikkumisut iluseqartillugu Inatsisartunit akuerineqarnissaa inassuteqaatigaa.**

**Ataatsimiititaliami amerlanerussuteqartut** Inuiat Ataqaatigiit, Demokraatit Kattusseqatigiillu Partiiat imatuttaaq immikkut oqaaseqaateqarput:

Ataatsimiititaliami amerlanerussuteqartut ataatsimiititaliami Naalakkersuisunillu inerititaqarfiusumik suleqatigiissimanermut qujapput. Ataatsimiititaliap allannguutissatut kissaatigisaanik allanngortillugu inatsisissatut siunnersuut Inatsisartunut saqqummiunneqartussa q amerlanerussuteqartut iluarisimaarpat. Pingaaruteqarpoq suliassa qarfimmi matumanisut taama pingaaruteqartigisumi immikkut pingaarnerit tamatigoortumik isumaqatigineqarmata. Ukiuni aggersuni naatsorsuutigaarput aatsitassarsiorneq inuiaqatigiinnut kalaallinut nunatsinilu aningaasaqarniarnermut suli pingaarneruteqarnerumaartoq taamaattumillu taamatut ingerlatsinermut inatsisitigut killiliussat inatsisiliortunit eqqumaffigineqartuarnissaat anner-tuumik pingaaruteqarluni. Inuiaqatigiinnut, avatangiisinut aningaasaqarniarnermullu iluaqutaasumik erseqqissunik paatsoorneqarsinnaanngitsunillu inatsiseqartuarnissarput anguniartu-artariaqarparput.

**Ataatsimiititaliami ikinnerussuteqartut** tassaasut Siumut aammattaq imaattumik immikkut oqaaseqaateqarpoq:

Ikinnerussuteqartut Siumumi ilaasortaatat aatsitassarsiornerup iluanut tunngasutigut tunngaviusumik isummersuutigisaminik saqqummiussinissaminut pissutissaqarsorivoq.

Siumup suli piumasaraa aatsitassarsiornermut tunngasuni akileraarummik royaltymik akiliisit-sisoqartarnissaa.

Siumup pingaarutilittut isigaa, aatsitassarsiornerup iluani akileraartarnikkut periuttip akileraarutip royaltip ajornartorsiutaanera inatsisissatut siunnersuutip matuma suliarineqarneranut atatillugu eqqarsaatigineqarsimasariaqaraluartoq. Siumup ilisimavaa maannakkut inatsisaasoq naapertorlugu, aatsitassarsiornermik ingerlataqarnermut atatillugu akuersissummik piginnittup periarfissat assigiinngitsut naapertorlugit akiliuteqartitaasarnissaa periarfissaasoq, soorlu nunaminertamik atuineranut, tunisassiornermut, pissarsianut naammassisaqarsinnaassutsimulluunniit akitsuummik. Siumup tamatuma allanngortinneqarnissaa kissaatigaa, periarfissaagin-narani piunasaqaatinngorlugu. Tassunga atatillugu apeqqutaaginnarpoq tamakkua atuutilersinneqarnissaannut tamatumuuna naalakkersuinikkut qanoq Inatsisartut tungaanniit piunasa-suseqartoqarnersoq. Maannakkut Kalaallit Nunaanni aatsitassarsiornerit angisuut piviusunngortinneqarsinnaaneri qanilliarporput, tamatumanilu Siumut isumaqarpoq suliniutit taamaattut sapinngisamik annerpaamik aningaasaqarnikkut kalaallinut inuiaqatigiinnut iluaqu-tissarsiviusariaqartut.

Ullumikkut aatsitassarsiornermik ingerlatsisunut akileraartarnikkut atuutsinneqartut naamma-ginartuullutillu inuiaqatigiinnut iluaqutaaneri Siumup upperivallaanngilai. Avaqqunneqan-gitsoorsinnaagunangilaq, aatsitassarsiornermik ingerlatsisut pissutsini immikkut ittuni aki-leraartarnerup tungaatigut arlaatigut iliuuseqarlutik nunatsinnut akileraarutiminnik apparsaa-niarsinnaammata. Siumup ilisimaarilluinnarpaa aatsitassanut inatsit arlaatigut avaqqutaarinia-rtoqarsinnaanera pinngitsoortinniarlugu tamatumuuna aalajangersakkanik ilaqartoq. Aalaja-ngersakkat immineq ajunngillat, kisiannili Siumut isumaqarpoq akileraariaaseq royalti ator-neqalerpat kalaallit inuiaqatigiit pisassaraluannik nalilinnik annaasaqarnissaannut tamanna pinngitsoortitsiniarnermi nukittorsaataassagaluartoq.

Akileraartariaatsip royaltip kiisalu suliffeqarfimmut nalinginnaasumik akileraartarnerup ator-neqarsinnaaneri, naalakkersuinikkut anguniarneqartariaqartut Siumut isumaqarpoq. Akileraa-rutip royaltip qanoq annertutiginnissaa Siumup aalajangersaaviginiannigilaa, tamanna soorunalimi naalakkersuinikkut soorluttaaq aamma periutsitigut paasinialuarneqaaqqartari-aqarmat. Kisianni Siumup takorloopaa soorlu royaltimut akiliutissaq 10-15% akornanni an-nertussuseqartinneqaruni tamanna naleqquttuusinnaasoq. Royaltimik akileraartarneq sulif-feqarfiup akileraartarneranut taamatulli annertussusilimmik apparsaavigineqarnermik malit-seqartariaqaraluarpoq. Taamaalilluni suliffeqarfiup aatsitassarsiornermik ingerlatsisup aki-liutigisartagai tamarmiusut qaffariarpallaqqunagit. Siumut isumaqarpoq taamatut akileraar-tarnikkut piunasaqaatinik allannguneq siumut isigisumik aqqissuunneqartariaqartoq, tassa-mi piunasaqaatit akuersissuteqarnermi atuutsinneqareersut tunngavigalugit ingerlatseqatigiif-finnut iluaquteqarniarnissamut akuersissummik pigisaqareersunut allannguniarneq, Kalaallit Nunaata isigineqarneranut iluaqutaanaviannigilaq. Aatsitassarsiornermik ingerlatsinernut aki-leraariaatsip royaltip atuutsinniarneqartup aatsitassanik piaanermik ingerlataqartunut atuuti-

lersinneqarnissaa pillugu Inatsisartut tamatumuuna tapersersueqqullugit Siumup kaammattuutigaa.

Aammattaaq Siumut isumaqarpoq siunissami aatsitassanik misissueqqaarnissanut akuersissummik tunniussisarnernut tunngatillugu akuersissummik piginnittup misissueqqaarnermi piginnaatitsissumminik inummut imaluunniit suliffeqarfimmut tunniussisup niuerutiginnittulluunniit aningaasatigut iluanaarutaanik Namminersorlutik Oqartussanut akiuliteqartitsisarnissamik aalajangersaasoqartariaqartoq.

Siusinnerusukkut pisoqarnikuuvoq, tassalu piginnaatitsissummik piginnittup misissueqqaarnissanut akuersissutimi ilaa iluanaarutigerujussuarlugu tunisimammagu. Assersuutigalugu 2009-imi oktoberimi tusagassiutini atuarneqarsinnaavoq, Skottit uuliasiornermik ingerlatseqatigiiffissuata Cairn Energyp Kalaallit Nunaanni misissueqqaarnissanut akuersissutimi arfiniliusut 10%-ii Malaysiaminut uuliasiornermik gassimillu qalluineramik ingerlataqartumut Petronasimut tunisimagai. Tusagassiorfiit malillugit Petronasip misissueqqaarnissanut piginnaatitsissutit taakkua kr. 350 millioninik akilersimagai. Iluanaarut tamanna Cairn Energyp piginnaatitsissumminit tunisinermini iluanaarutigisaa Namminersorlutik Oqartussat sualaatiginngilaat. Misissueqqaarnissanut piginnaatitsissutit Namminersorlutik Oqartussanut siusinnerusukkut akileraarusiinertaqanngitsumik tunniunneqartartut.




Taama oqaaseqarluni isumaliutissiisummiilu allassimasunut paasinnilluni ataatsirmiittaliap siunnersuut aappassaniigassanngortippaa.



Siulittaasoq



Siulittaasup tullia





Inuussutissarsiornermut Ataatsimiititaliaq  
Inatsisartut  
/TAMASSA

Dato: 11. november 2012

J.nr.: 01.36.02.03-00087

**Imm. UKA2012/112-ip Inuussutissarsiornermut Ataatsimiititaliamit sularineqarneranut atatillugu apeqqutinik akissutit.**

Imm. UKA2012/11-imut tunngatillugu ataatsimiititaliap apeqqutaanut akissutit nalunaarsorneqarput. Apeqqutit ataasiakkaat ataanni toqqaannartumik akissutit nalunaarsugaapput.

**Nr. 1. pillugu**

- § 3 a**
- a) Paragrafimi aalajangersagaq ima paasineqassava; Aatsitassanut Ikummatissanullu Aqutsisoqarfik aammalu Avatangiisinut Aqutsisoqarfik aatsitassanut oqartussaqaarfiup ataani naligiillutik inissisimasut?
  - b) Imm. 6 aamma 7 malillugu Aatsitassanut Ikummatissanullu Aqutsisoqarfik oqartussaasutut ataqatigiissaarisuuvoq allaffissornikkut attaveqaqateqarnermik isumaginnittoq. Aalajangersagaq ima paasineqassava; Avatangiisinut Aqutsisoqarfik Aatsitassanut Ikummatissanullu Aqutsisoqarfiup ataaniittoq? Aammalu tassunga atatillugu Avatangiisinut Aqutsisoqarfiup aalajangigaanik Aatsitassanut Ikummatissanullu Aqutsisoqarfik allannguisinnaava?

**Akissutit**

- a) Aatsitassaqaarnermik oqartussaaffiup nutaamik aqqiissuussaanera siunnersuutip aalajangersarpaa, tassaniillutik Naalakkersuisut, aammalu sulianik oqartussaaffiit ataaniillutillu naligiissitaasut: aatsitassaqaarfiusumut Aatsitassanut Ikummatissanullu Aqutsisoqarfik, aammalu Avatangiisinut Aqutsisoqarfik.
- b) Siunnersuutip aatsitassaqaarfiusumi oqartussaasunik ataatsimoortitatut ilanngussuisumillu isumaginnittarneq pillugu pingaarnertut tunngavigisamik siunnersuut allannguuteqanngilaq. Siunnersuut naapertorlugu Aatsitassanut Ikummatissanullu Aqutsisoqarfik aamma Avatangiisinut Aqutsisoqarfik pisinnaaffeqaarfimmik iluini tamani nalinginnaasumik aalajangiisinnaassuseqarput. Taamaallilluni Avatangiisinut Aqutsisoqarfik Aatsitassanut Ikummatissanullu Aqutsisoqarfiup ataaniinngilaq, aammalu Aatsitassanut Ikummatissanullu Aqutsisoqarfik Avatangiisinut Aqutsisoqarfiup aalajangiussaanik allannguisinnaanngilaq. Taamatut iliorsinnaasutuaapput Naalakkersuisut.

**imm. 3.**

Avatangiisinut Aqutsisoqarfik oqartussaaffinnik tigussaasunik sunik tunineqartusatut Naalakkersuisunit naatsorsuutigineqarpa?



## Akissut

Aatsitassaqaarfiusumut tunngatillugu avatangiisini pissutsinik, ilanngullugit avatangiisinik illersuineramik, pinngortitamik illersuineramik, avatangiisinut akisussaaffigisamik aamma avatangiisinik naliliinermik Avatangiisinut Aqutsisoqarfik allaffissornikkut oqartussaaffeqarpoq. Aatsitassaqaarnermut qullersatut oqartussaaffittut Naalakkersuisut aatsitassaqaarfiusumut tamakkilsumik allaffissornikkut sulli oqartussaaffeqarput, isumagisussaallugit inatsimmi ilaasutut aatsitassanut, aatsitassanik sulianut allanillu sulianut pissutsinik tamanik tamakkiisumik ilanngussuisumillu oqartussanit isumaginnittoqartarnissat.

Taamaattumik Aatsitassanut Ikummatissanullu Aqutsisoqarfik aamma Avatangiisinut Aqutsisoqarfik pisinnaasaqaarfimmik iluini tamani nalinginnaasumik aalajangiisinnaatitaapput. Siunnersuummi § 3 a, imm. 3 tassungalu nassuiaatit naapertorlugit aatsitassaqaarfiusumut tunngatillugu avatangiisini pissutsinik tamanik Avatangiisinut Aqutsisoqarfik misissuisarlunilu naliliisassasoq aammalu aalajangiussisinnaassasoq. Pisinnaasaqaarfiup taassuma iluani Avatangiisinut Aqutsisoqarfik sunik tamanik aalajangiisinnaavoq, ilanngullugit pisinnaatitaaffimmik pigisaqartup avatangiisinik nassuiaataanik akuersissuteqarsinnaallunilu, imaluunniit itigartisisinnaalluni.

### imm. 5.a)

Ingerlatat inuiaqatigiinnut imaluunniit avatangiisinut annertuumik sunniuteqarsinnaasutut, taamaalillunilu aamma sullassat sorliit tassunga atatillugu Naalakkersuisunut saqqummiunneqassanersut, Aqutsisoqarfilt arlaata sorliup aalajangertassavaa?

## Akissut

Aatsitassanut inatsimmi § 73 sularisat sorliit avatangiisinut annertuumik sunniuteqarsinnaasasut pillugit aalajangersakkanik imaqarpoq:

*"Ingerlatanut tulliuuttunut arlaannut akuersissut aamma akuerinneq taamaallaat tunniunneqarsinnaavoq, ingerlatamik isumaginninnermi avatangiisinut sunniuteqarnissaasa nalilersorneqarnerat tunngavigalugu, tamannalu pillugu avatangiisinik nalilersuilluni nassuiaammik aatsaat sularinnittoqareerpat akuersissut tunniunneqarsinnaavoq:*

- 1) Ikummatissanik pilaaneq.
- 2) Aatsitassanik pilaaneq, kapitali 8 malillugu aatsitassanik annikitsumik pilaaneq aamma kapitali 11 malillugu akuersissuteqarnani aatsitassanik katersineq pilaanerlu ilanngunnagit.
- 3) Nunap iluanik toqqorsivittut atuineq imaluunniit aatsitassanik ingerlatsinermut atatillugu siunertat.
- 4) Inatsisartut inatsisaat manna malillugu sammisanut ilaasunut imermit, anorimit imaluunniit nunap iluanit atorluaalluni nukissiorneq.
- 5) Sanaartukkanik/atortunik annertuumik inatsisartut inatsisaannut ilaasunik atorineqartunik pilersitsineq imaluunniit inissilneq atuinerlu, tamakkununga ilaallutik avataani pilaaffiit, avataani pilaaffiit nuunneqarsinnaasut, umiarsuit najugaqaarfiusut, qaarusuit aatsitassarsiorfiit, nunap iluani atortut, sulianut atatillugu nukissiorfiit aamma ruujorikkut aqqusersuineq.
- 6) Ingerlatamik unitsitsineq imaluunniit sanaartukkanik/atortunik assigisaannillu nr. 1-5-imi taaneqartunik ingerlatsineq imaluunniit sanaartukkanik/atortunik nr. 5-imi taaneqartunik isaterineq imaluunniit matusineq."

Ingerlatat avatangiisinut annertuumik sunniteqarsinnaasorisat Naalakkersuisut akuersisutigisaannik avatangiisinik naliliisoqarnermik aammalu VVM-imik nassuiaammik aamma pisariaqartitsipput.

Qulaani pineqartunut naleqqiullugit pisuni taakkunani allani ingerlatat avatangiisinut annertuumik sunniteqarsinnaanerannik, aammalu avatangiisinik sunnutaasunik nalilinermik suliaqarlunilu VVM-imik nassuiaasiortoqarnissaanik Naalakkersuisut aalajangiussinissaanik pisumi tassani Aatsitassanut inatsimmi aalajangerneqarpoq.

Aatsitassanut inatsisip allanngortinnissaanut siunnersuut naapertorlugu ingerlatanik avatangiisinik annertuumik sunniteqarsinnaassasunut imaluunniit sunniteqarsinnaassanngitsunut Naalakkersuisut suli tassaassapput aalajangiisartussat. Aalajangiineq taanna pis-saaq Avatangiisinut Aqutsisoqarfiup innersuussutaa naapertorlugu. Inuiaqatigiinni piujuartit-sinermik naliliisoqarneranut atatillugu apeqqummi Aatsitassanut Ikummatissanullu Aqutsi-soqarfimmit innersuussisoqarneq § 76, imm. 2 naapertorlugu Naalakkersuisut aalajangiis-sassapput.

**§ 3 b +3 c** a) Kikkut naammagittaalliorsinnaatitaanersut siunnersuummi allassimangi-laq. Assersuutigalugu avatangiisinut inatsimmi § 60-imi aalajangersakkap as-singanik tamanna pillugu aalajangersakkamik Naalakkersuisut ilanngussiler-saarpat? Taamaangippat imarisamikkut taamatut assiglinngissuteqartaria-qarnerat sooq Naalakkersuisunit isigineqarnersoq itisilerneqassasoq ataatsimiititaliamit kissaatigineqarpoq?

b) § 3-mi aalajangersagaq ima paasineqassava; naliliinissami suliamut immik-kut ilisimasaqarnissap pisariaqarnera pissutigalugu naammagittaal-liorsinnaanermut periarfissamik Naalakkersuisut killiliisimappata Aatsitassanut Ikummatissanullu Aqutsisoqarfiup imaluunniit Avatangiisinut Aqutsisoqarfiup aalajangigaata naammagittaalliutigineqarnissaanut periarfissaqanngitsoq?

c) Apeqqummut b)-mut qulaaniittumut akissut "aap"-iuppat, maalaaruteqartup maalaarumminik isumatiginnissaanut sunik periarfissaqassava. Taamaat-toqartillugulu kikkut qullersatut oqartussaasuussappat?

#### **Akissutit**

a) Avatangiisinik illersuinissamik inatsimmi § 60-imi aalajangersagaq imaalliallaannaq nuunneqarsinnaanngilaq, Avatangiisit illersornissaannut tunngatillugu Maalaaru-teqartarnermut ataatsimiititaliamut avatangiisit illersornissaat pillugu Inatsisartut inatsisaat naapertorlugu aalajangiussat maalaarutigineqarsinnaammata. Naalak-kersuisut aalajangiussaannut maalaaruteqarnissamut attavissamik pilersitsisoqas-sasoq UPA2012/61-imik Inatsisartut aalajangiussassaattut siunnersuummi siun-nersuutigineqarpoq. Siunnersuummik taassuminnga erseqqissaassutissatut inatsisi-lerituumit allakkialiortoqarpoq. Siunnersuutigineqartutut aatsitassaqarfiusumi quller-satut maalaaruteqarnermut oqartussaasoqarfiup tunngaviusutut demokratiskimik tunngavigisaasunut aammalu oqartussaaffiit pingasut akornanni aqutsisoqarfimmi pissaaneqarfignanut inatsisip tunngaviusup agguataarineranut akerliussasoq allak-kiami inernilissutigineqarpoq. Aatsitassanik inatsisip allanngortinnissaanut siun-nersuutip siullermeernerata kingornatigut inatsisilerituumit allakkiaq Inatsisartuni ilaasortanut nassuiaammi nassiussuunneqartumi ilanngussaq 5-itut ilanngunneqar-

poq. Maalaaruteqarsinnaasut kikkunerat nalinginnartut "inunni ataasiakkaani plngaarutilimmik soqutigisaqarnermik" najoqqutassiaq, oqartussaaffeqarfinni inatsisigitigut tunngavigisaasunit malitseqartuusooq aallaavigalugu killilersorneqarpoq. Taamaattorli Inuussutissarsionermut Ataatsimiititaliami tamatumunnga akuersaar-toqassappat kikkut maalaaruteqarsinnaatitaanerat annertusineqarsinnaanera allannguutissatut siunnersuummik saqqummiussinissaminnut Naalakkersuisut piareersimapput.

- b) Naalakkersuisunut maalaaruteqarnissamut killiliinissamik najoqqutassaqarnissaq pisuni immikkut teknikkimut tunngassuteqartuni, assersuutigalugu sinerissap avataani uullasiorfiit sanaartugaaffiini, geologiimi aamma aatsitassarsioriaatsit iluini immikkut ittumik ilisimasaqarnissamik tunngaveqarluni naliliisarnernik aalajangiussinerni atugaasussatut eqqarsaatigineqarpoq. Assersuutigalugit tassaasinnaapput uulliakoornissap pinaveersinniarnernik erniinnaartumik immikkut illiuseqarnissamik uullasiortutut ingerlatseqatigiiffimmut peqqusissutip nalunaarutigineqarnera, imaluunniit qillerinermut atortussanut teknikkikkut najoqqutassanik qanorlu issusissaannik aalajangersaanissat. Taamatutaaq teknikkikkut paasiuminaatsortalinni immikkoortortani allani danskit inatsisaanni maalaaruteqarnissamut killiliisarnernit pillugit aalajangersakkat aamma ilisimaneqarput. Assersuutigineqarsinnaavoq imarsionermik inatsisaasut, tassani maalaaruteqartarneq pillugu inatsit naapertorlugu Imarsionermut Aqutisoqarfiup imaluunniit pisorta qarfiit oqartussaasut allat aalajangiussinerat pillugit oqartussaasoqarfimmut allamut ingerlanneqarsinnaannginernerinik aalajangersaasoqarsimalluni. Assersuut alla tassaavoq danskit timmisartortarnermik inatsisaanni aalajangersakkat assingusut.
- c) Taamaattorli piviusorsiuungitsumik tunngaveqartumik, imaluunniit suliamik isumaginninnermi aqutisoqarnikkut inatsisaasuni aalajangersakkanik allatut sanioqqutitisoqarluni aalajangiussisoqarsimagaangat Naalakkersuisunut maalaaruteqartoqarsinnaavoq.

### nr. 5. imm. 3.

Oqaatsit "sulianut pisariaqartumik piginnaaneqassaaq" qanoq kinguneqassappat?

### Akissut

Nalinginnartut aqutisoqarnikkut inatsisaasunik annertussusiliinissamik tunngavigisat naapertorlugit oqaatsit aalajangersagaapput. Isuma qarput maanakkut ingerlatarisamut naleqqiullugu sulianik piginnaaneqarnerit inissineqarnissaannik piumasaqarneq. Tassaagajuttassapput suliffeqarfiit anner-tunngitsut, assassorluni sakkunik pisariunngitsunik atugaqarluni killilimmik ingerlataqartuusut. Aatsitassanut inatsisaasumut atuuttuusumi taamatutaaq malittarisartaqarpoq.

### nr. 6. imm. 4.

"Sumiiffik...akuersissuteqarfiusimasumut imaluunniit akuersissuteqarfiususamut ilaatinneqanngilaq" – sumiiffiit sorliit siunissami akuersissuteqarfiusasut qanoq ililluni paasineqassava?

## Akissut

Kisermaassisinnaatitaanani akuersissut nunap ilaani immikkoortortamut an-gisuumut tunniunneqartarpoq, kisermaassisinnaatitaanilu akuersissutaam-mat kismaassisinnaatitaalluni akuersissutitut inissaliisoqassaaq, taakkulu immikkoortortamut annikinneerarsuarmut aalajangersimasumik killeqarfilikka-mut tunniunneqartarput. Taamaalluni kisermaassisinnaatitaanatit akuersissut tamatigut kisermaassisinnaatitaalluni akuersissutitut naleqqiullutik tunuarsi-maarsimajuassapput, aamma siulliup tunniunneqarøernerata kingorna kiser-maassisinnaatitaalluni akuersissut tunniunneqaraluarpat.

- nr. 8 imm. 4. a)** Annikitsumik qaartiterinissamik akuersissuteqarnermut atatillugu inunnik ajoqusertoqannginnissaa Naalakkersuisunit qanoq qulakkeerneqalersaarpa?
- b)** Annikitsumik qaartiterinissamik akuersissutitaqartumik annikitsumik aatsi-tassarsionissamik akuersissuteqartunut atatillugu maleruagassat eqquutsin-neqarnerat kikkunnit nakkutigineqartussat Naalakkersuisunit naatsorsuutigi-neqarpa?

## Akissutit

- a) Annikitsunik qaartiterinissamik akuersissutit pisinnaatitaaffeqartup atugaqar-neranik nakkutilliineq pillugu Naalakkersuisut erseqqinnerusunik aalajanger-sakkanik aalajangiiniarput. Taamaalluni annikitsunik qaartiterinermik akuersissutit nalunaarutigisinnagit piumasaqaatinik aalajangersaasoqarsinnaas-saaq, ilanngullugit atortussanut atorneqartussanut piumasaqaatit aammalu taamatut annikitsunik qaartiterinermik suliaqarsinnaanissamut pisinnaatitaaf-feqartuusup ilisimasaqarnissaanik piumasaqaatit.
- b) Annikitsumik ingerlaqarnermik akuersissuteqarnermut annikitsunik qaartiteri-nermik akuersissuteqarfeqartunut atatillugu aalajangersakkanik nakkutilliinerit Aatsitassanut Ikummatissanullu Aqutsisoqarfimmiissaaq, taannalu aamma aatsitassanik inatsisip atugaaffiini immikkoortortat sinnerini qaartiterinermik nakkutilliisuuvoq.

- nr. 10 § 45 a a)** Suut tunngavilugit aningaasat 100.000 kr.-inut aalajangiunneqarpat?
- b)** Aningaasat amerlineqarnerat / ikilineqarnerat qanoq pitsaaquteqarsinnaava / ajoquteqarsinnaava?
- c)** Aningaasat 100.000 kr.-it qaangerneqarnerat qanoq kimillu nakkutigineqas-sava?

## Akissutit

- a) Aatsitassat pillugit ingerlatallu tamatumunnga pingaarutillit pillugit Inatsisartut inatsisaat nr. xx, xx 2009-mut (aatsitassanut inatsimmut) siunnersuutip saqqummiunneqarnerani assingusumik 100.000 kr.-t tikillugit killeqarfillaqar-poq. Inatsiseqarnermut ataatsimiititaliap isumaliutissiissutaa tunngavigalugu allannguutissatut siunnersuut saqqummiunneqarlunilu akuersissutigineqar-poq, killissarfititaaq taanna siunnersuummi ilaajunnaarluni. Najugaqarfinni ka-tersuisartunit kissaatigisap naapinniarlugu siunnersuut saqqummiuteqqin-neqarpoq, Inuussutissarsionermut Ataatsimiititaliamili tamatumunnga akuer-

sissuteqartoqassappat allannguutlissatut siunnersuummik saqqummiussinlissaminut Naalakkersuisut piareersimapput.

- b) Pitsaaqutaasunik / ajoqutaasunik imaalliallaannaq takussutissiisoqarsinnaasannngilaq, taamaattorli aningaasat amerlassusaannik qaffaanikkut inuussutisarsiuutigalugu atuisoqarneranik imaluunniit atuisoqannginneranik takussutissiiniarneq ajornakusoortinnerulersinnaassavaa.
- c) Nalinginnaasumik akileraarnermik nakkutillinermut ilaatillugu Akileraartarnermut Aqutsisoqarfimmit nakkutillineq isumagineqassaaq. Killiliissummik 100.000 kr.-usumik sinneqartoortoqarpasissunik ingerlatat annertussuseqarnerinik Aatsitassanut Ikummatissanullu Aqutsisoqarfik ilisimasaqalissappat tassaalissaaq suliaq Aatsitassanut Ikummatissanullu Aqutsisoqarfiup ataaniilersussaaq.

#### § 45 b

a) Takornariat ujaqqanik nassaanik katersisinnaanerisa nassarsinnaanerisalu nunanit allanit akuerineqarnerannik / Inerteqqutigineqarnerannik imaqartunik maleruagassanik Naalakkersuisut misilittagaqarpat aamma/imaluunniit ilisimasaqarpat?

b) Takornariat ujaqqanik 5 kg.-mit oqimaannerunngitsunik ukiumut nasannnginnissaat qanoq nakkutigineqartussatut Naalakkersuisunit eqqarsaatigineqarpa? Taamatullu nakkutillinnissaaq kimit isumagineqassava? Aalajangersakkap tamatuma eqquutsinneqarnerata nakkutigineqarnissanut piviusumik periarfissaaqarpa?

#### Akissutit

- a) Naalakkersuisut siunnersuummik nunanit allanit misilittakkat imaluunniit malittarisassiat tunngaveqartippaat.
- b) Ujaqqat 5 kg-t sinnerlugit nassarneqassappata aallartoqarnerani avammut nassataqarnissamut akuersissummik angalasup takutitaqarsinnaanissaa pisariaqarpoq. Manna tikillugu nakkutillineq nalinginnarmik tikittoqarlunilu aallartoqartarnermik nakkutillinermut ilaasutut Akitsuusiinermut oqartussaaffiusunit Politinillu isumagineqassaaq.

#### § 45 d

Aatsitassanik akisuunik, soorlu rubininik tugtupitsinillu innuttaasut katersisinnaajunnaarnerannut paaasinnaajunnaarnerannullu suna tunngavilersuutaava?

#### Akissut

Manna tikillugu innuttaasut suli aatsitassanik nunaannarmiittunik katersisinnaapput, ilanngullugit aatsitassat naleqartut, soorlu rubinit aamma tugtupitsit. Manna tikillugu aatsitassanik paaasoqarnissaanut sakkunik qanorluunniit iluseqartunik atugaqartoqaqqusaanngilaq. Aatsitassanilli aningaasarsiorluni inuk atugaqarnissaminik kissaateqarpat, ilanngullugit aatsitassat naleqartut, soorlu rubinit aamma tugtupitsit, tamatumunnga akuersissummik qinnuteqartoqassaaq. Taamaalilluni Namminersorlutik Oqartussat aalajangersagaatut malittarisassiat naapertorlugit atuisoqarnerup isumagineqarnissaa manna tikillugu pisarneratut isumannaarneqassaaq, naleqassutsillu sapinngisamik annertunerpaamik inuiaqatigiinnut tuttassallutik. Tamatumunnga tunngaviusoq tassaavoq aatsitassanut naleqartunut allaat annikitsuarsuarannut annertuupilus-

suarmik naleqassuseqartoqarsinnaanera. Immikkoortortamik tamatumingga nakkutilliineq ujaqqanut erlinnartunut atasunik aningaasarsiuutigalugu ingerlatanut sunulluunniit akuersissuteqarnermik aaqqissuussissummik piumasaqaateqartoqarneratigut sunniuteqarluartumik taamaallaat ingerlanneqarsinnaavoq.

#### **Nr. 12 § 78 a**

§ 16 naapertorlugu akuersissummi "saaq" pinnagu "sinnaapput"-mik Naalakkersuisut atuinerannut suna tunngaviuva.

#### **Akissut**

Pisuni ataasiakkaani tamani piviusunik naliliisinnaanissamut kiffaanngissuseqarlutik missiliunissamut sinaakkutissamik Naalakkersuisunut atugassilniarluni "saaq" pinnagu "sinnaapput" atorneqarpoq.

#### **Aatsitassarsiornermut tunngasut ataatsimut isigalugit?**

a) Apeqquteqaat aallaavigalugu oqallisissiamut UKA 2011/50-imut akissuteqaammi Naalakkersuisut oqaaseqaataannit takuneqarsinnaavoq anner-tuumik aatsitassarsiornermut akuersissutit, aalajangiinissaq sioqqullugu, Inuussutissarsiornermut Ataatsimiititaliamut oqaaseqarfigisassanngorlugit saqqummiunneqartarnissaat Naalakkersuisut siunnersuutigigaat. Tamanna pillugu aalajangersakkami inatsisissatut siunnersuummi ilanngussisoqanngin-neranut suna tunngaviuva?

b) Kiisalu aatsitassarsiornermut inatsimmi § 54 naapertorlugu aalajangersak-kat suut Naalakkersuisunit aalajangersaavigineqarsimanersut paasissutissiis-sutigineqassasoq ataatsimiititaliamit kissaatigineqarpoq? Tamanna naatsumik pissasoq ataatsimiititaliamit qinnutigineqarpoq.

#### **Akissutit**

a) Inuussutissarsiornermut Ataatsimiititaliami siunnersuummut taama ittumut akuersissuteqartoqarsinnaappat kulbrintinut tunngatillugu atuinissamik akuersissutit aamma neqeroortitsisarnernik akuersissuteqarnerit pillugit Naalakkersuisut aalajangiussinissaat sioqqullugu Inatsisartuni ataatsimiititaliamut oqaaseqaateqarfigisassanngorlugit saqqummiunneqarsinnaanissaanik al-lannguutissatut siunnersuutip saqqummiunnissaanut Naalakkersuisut piareer-simapput.

b) Aatsitassanut inatsimmi § 57 aalajangersagaq naapertorlugu aalajangersa-gaasut tullerijaarneri:

- Kalaallit Nunaanni aatsitassanik ujaasiner-mut misissueqqaarnermullu qinnuteqarner-mut ingerlattakkat nalinginnaasutullu piumasaqaatit.
- Kalaallit Nunaanni aatsitassanut tunngatillugu (kulbrintit pinnagit) asimi suliner-mut nalunaaruteqartarnermullu malittarisassiat. Namminersorerullutik Oqartussat.

- BMP guidelines – for preparing an Environmental Impact Assessment (EIA) Report for Mineral Exploitation in Greenland. Bureau of Minerals and Petroleum. 2nd Edition. January 2011. (EIA guidelines)
- BMP Guidelines for applications, execution and reporting of offshore hydrocarbon exploration activities (excluding drilling) in Greenland, December 2011
  - Guidelines for submission of scope of project for offshore hydrocarbon exploration activities (excluding drilling)
  - Guidelines for Environmental Impact Assessment (EIA) concerning seismic surveys in Greenland waters 2012
  - Guidelines for Environmental Mitigation Assessment (EMA) concerning seismic surveys in Greenland waters 2012
  - NERI Manual for seabird and marine mammal survey on seismic vessels in Greenland
  - Template for Fishery Liaison Officer logbook
  - Requirements for submittal of data
- Exploration Drilling Guidelines, May 2011
  - Guidelines for preparing an Environmental Impact Assessment (EIA)
  - NORSOK D-010: NORSOK Standard D-010, August 2004, Well Integrity in Drilling and Well operations.
  - NORSOK D-SR-007: NORSOK Standard D-SR-007, Jan 1996, System Requirements - Well Testing Systems.
  - NORSOK R-003: NORSOK Standard R-003, July 2004, Safe use of lifting equipment.
  - NORSOK S-001: NORSOK Standard S-001, February 2008, Technical Safety.
  - NORSOK S-003: NORSOK Standard S-003, December 2005, Environmental Care.
  - NORSOK Z-013: NORSOK Standard Z-013, Oct. 2010, Risk and emergency.
- BMP's guidelines for stratigraphic drilling
  - BMP's guidelines for preparing an EIA related to stratigraphic drilling

Naalakkersuisunut ilaasortaq

 Ove Karl Berthelsen